

PRIČA O PORODICI RAMOVIĆ



Mirsad i Namira Ramović roditelji su petogodišnjeg Benjaminu i devetogodišnje Amile. U periodu od 1992. do 1996. bili su raseljeni u Goraždu, Jablanici i Sarajevu. Bolan trenutak za ovu porodicu se desio kada se rodio sin Benjamin, koji je imao dvije kliničke smrti. Greškom ljekara, Benjamin je ostao 90 postotni invalid, dijete sa posebnim potrebama. Ne čuje i ne govori... Ovaj nesretni događaj odredio je sudbinu porodice Ramović. Blizina bolnice i svakodnevna medicinska njega

učinili su sve do 2013. godine ostanu u Sarajevu, gdje su živjeli u iznajmljenom stanu. "Naš gazda nikada nije rekao da barem jedan mjesec ne platimo kiriju", kroz suze govori Namira, "troškovi liječenja Benjaminu su bili izuzetno visoki i nismo više mogli da plaćamo. Protekle četiri godine živjeli su u neuslovnom objektu u Ustikolini. "Puhalo je sa svih strana – svake zime nam je trebalo pozamašno drva da bismo izdržali zimu.", kaže Namira. Novi stan, u zgradi izgrađenoj u okviru Regionalnog stambenog programa (RSP), u Ustikolini, blagoslov je za ovu porodicu. Više neće morati plaćati visoke kirije, a uslovi za život su drastično bolji u odnosu na prijašnje. Neovisno od toga, sin Benjamin i dalje je bolna tačka svojim roditeljima. Tri puta sedmično mora odlaziti kod logopeda, defektologa i psihijatra u Foču i Goražde. Troškovi prevoza su visoki, a svaki izostanak može naškoditi Benjaminovom razvoju. Misija OSCE-a u BiH pomogla je ovoj porodici tako što će do 15.12.2017. godine snositi troškove prevoza do ljekara, međutim Namira i Mirsad su zabrinuti kako će nastaviti poslije toga. Benjamin ima šansu da progovori, te da za dvije ili tri godine krene u školu, ali svakodnevna komunikacija sa stručnjacima je ključna u rješavanju ovog problema. Namira se nada da će sa riješenim stambenim pitanjem stvari krenuti na bolje. Ujedno, kćerka Amila moći će da se posveti školi, s obzirom da je izuzetna učenica, sa odličnim ocjenama. U okviru pomoći održivom podratku, od Catholic Relief Service-a (CRS) porodica Ramović je dobila plastenik, površine 100 m², u kojem će moći da unaprijede proizvodnju povrća. Uprkos mnogim životnim nedaćama, na Namirinom i Benjaminovom licu je osmijeh i istinska želja za životom u boljim uvjetima koje su obezbijedili donatori RSP-a.

Regionalni stambeni program finansira i podržava međunarodna zajednica



Regionalni stambeni program (RSP) ima za cilj da obezbijedi trajna rješenja za stambeno zbrinjavanje raseljenih lica nastalih nakon sukoba na teritoriji bivše Jugoslavije u periodu od 1991-1995. godine. RSP sprovode Bosna i Hercegovina, Hrvatska, Crna Gora i Srbija, a finansira najvećim dijelom međunarodna donatorska zajednica. Glavni donator je Evropska Unija. Ostali donatori su SAD, Njemačka, Italija, Norveška, Švajcarska, Danska, Turska, Luksemburg, Kipar, Rumunija, Republika Češka, Republika Slovačka i Mađarska.